



巡撫直隸等處地方管轄紫荆等關宣府一鎮
地方密雲等關隘贊理軍務兼理糧餉都察
院右僉都御史臣于成龍 謹

題爲衙蠹誣執賊情事該

臣

看得定例營弁拿獲

盜賊應送有司審理不得私自刑訊而腦箍竹
簽人奉禁止乃有愍不畏法如宣府西城守備

吳大任者將遠年掏摸之劉登瀛妄指爲行竊
西城當舖宋士玉之盜並不移送有司審理擅

用腦樞竹簽復用夾棍夾頭又縱役逼扳無辜
之僧人滿會等勒索銀錢吳大任將滿會刑夾
鐐禁致令登瀛等家屬訐告冤情經口北道王
騰歷審有據呈詳前來相應

題叅請

旨將吳大任革職與吊拷指扳之兵番張仲林何三
常佐等一併提問究擬者也臣謹會同宣府鎮
臣閔可權合詞具

題伏乞

睿鑒施行臣未敢擅便謹

題請

旨康熙二十五年七月二十二日題 月 日奉
旨這所叅吳大任着革了職并本內有名人犯該撫
嚴提究擬具奏該部知道

巡撫直隸等處地方管轄紫荆等關宣府一鎮
地方密雲等關隘贊理軍務兼理糧餉都察
院右僉都御史臣于成龍 謹

題爲衙蠹誣執賊情事該_臣看得西城革職守備

吳大任擅用非刑又縱役詐贓經_臣會同鎮臣

閔可權會疏

題叅奉

旨提問究擬行據巡道僉事胡獻徵審擬招解_臣復

親訊緣土番何三妄報劉國金爲行竊宋士玉
之盜犯大任卽差張仲林協同何三擒拿劉國
金疊加刑訊國金畏刑妄供劉登榮爲同夥且
將自己藍布單袍爲贓物何三詐劉國金之父
清錢一千一百文大任隨又差常佐同何三擒
拿劉登榮因無踪跡卽執伊兄劉登瀛非刑究
問而何三逼扳僧人滿會爲窩家吳大任拘提
滿會刑訊何三常佐又私加錘打歷審各犯供

認情真何三應依律杖流常佐枷責革役張仲
林重杖奚辭吳大任滿杖折贖何三名下贓錢
照追入官劉國金等供扳劉登榮等爲盜審係
畏刑妄供應毋庸議布疋單袍給還各主行竊
宋士玉家真賊緝獲另結理合具

題伏乞

勅部議覆施行臣未敢擅便謹

題請

旨康熙二十五年十二月十五日題二十六年正月
二十七日奉

旨該部核擬具奏該刑部臣等看得何三妄報劉國
金爲盜革職守備吳大任擅用非刑一案據直
隸巡撫于成龍審擬流枷杖罪具題前來查宋
士玉當舖被竊番役何三妄報劉國金爲行竊
吳大任卽差番役張仲林協同何三擒拿何三
詐國金之父清錢一千一百文大任疊加刑訊

國金畏刑妄供劉登榮爲同夥大任隨又差番
役常佐同何三擒拿劉登榮之兄劉登瀛非刑
究問而何三逼登瀛扳僧人滿會爲窩家大任
拘提滿會刑訊何三常佐又私將滿會鐐打該
撫歷審俱各自認情真何三合依凡誣告人徒
罪加所誣罪三等杖一百流三千里律應僉妻
流三千里到配所折責四十板常佐合依番役
人等獲盜私刑者於本衙門枷號一個月責四

十板吳大任合依奉制書有所施行而違者杖
一百律應杖一百原係官照律折贖張仲林合
依不應重律杖八十折責三十板常佐張仲林
仍革役何三所得之錢照追入官劉國金等審
係無干無庸議袍布等物給還原主行竊宋士
玉家真賊嚴緝獲日另結等因康熙二十六年
二月十四日題本月十六日奉

旨依議

巡撫直隸等處地方管轄紫荆等關宣府一鎮
地方密雲等關隘贊理軍務兼理糧餉都察

院右僉都御史臣于成龍 謹

題爲叩伸慘殺沉寃事該_臣看得太監張進昇殺
害平民而寸磔之真窮克極惡之徒也查進昇
原係吳逆家奴今虎踞采育地方恐民人高然
首其隱匿

欽賊將高然毒打斃命割頭卸足又碎戮其屍舉火

焚燒抬埋殘骨屍灰而又拋颶河內詐言高然
至伊家拐去弓箭逃遁無踪捏報於東安縣該
縣曲爲庇護以致沉寃莫訴今據屍子高文功
將寃慘情詞赴臣控告臣咨部提到張進昇等
研鞫親見張進昇之喝令家人綑綁高然者生
員盧萬象以及進昇之家人陳進孝等也目擊
進昇先使大花子行兇進昇父子又持棍狠擊
者亦係陳進孝等也看守高然迨高然畢命傳

報於張進昇者陳進孝朱國熙也割頭卸足張
天祥自認不諱拋颶殘骨屍灰張文成二花子
供吐鑿鑿此皆不加刑訊而歷供如繪更可異
者於初審時張進昇惟恐刑審陳進孝等吐出
真情乃着張弘韜使呂奇送給陳進孝張文成
忍刑麻藥囑其服之不可招承則是張進昇之
兇謀已畢露矣進昇猶以陳進孝等誣陷置辯
及將進昇之弟張天祥等庭質面証而進昇語

塞無辭然尚未肯將行兇實情逐一供明也總
之張進昇身恃旗下太監不服審理臣查凡旗
人爲盜外官得以審明定案他事例不定擬今
此案屍親係民要証亦係民且曲庇張進昇之
原任東安縣知縣吳兆龍亦有提質之處臣冒
賣

宸聰可否將張進昇等容臣審擬具
題或竟

勅法司提問究擬臣未敢擅便伏乞

睿鑒施行康熙二十五年七月二十二日題八月初

四日奉

旨據奏張進昇打死民人高然復碎戮其屍拋颺河
內大干法紀張進昇等著該撫嚴拿究擬具奏該
部知道

巡撫直隸等處地方管轄紫荆等關宣府一鎮
地方密雲等關隘贊理軍務兼理糧餉都察
院右僉都御史臣于成龍 謹

題爲叩伸慘殺沉寃事該_臣看得太監張進昇將

民人高然打死碎戮其屍焚燬拋屍_臣據屍子

高文功控詞提集犯証審明具疏

題叅奉

旨嚴拿究擬行據巡道僉事胡獻徵審明詳解_臣復

親訊張進昇原係吳逆家奴領銀貿易有東安
縣民高然爲之管帳迨吳逆叛亂然卽辭歸進
昇知高然頗有積蓄希圖訛詐康熙二十二年
十二月二十七日聞高然至伊所居采育地方
呼至家中覲面索銀高然不爲曲從且以進昇
隱匿吳應熊逆本銀兩竟行指摘進昇恨怒令
僕何大花子將然洗剝綁縛持棍毆打又自己
持棍毒打勒寫借券嗔其毀罵復行狠擊囑張

錦假寫高然借約使朱國熙膽清然於當夜傷
重身死進昇遂令張天祥等碎戮其屍舉火焚
燬埋於河坡繼又起出拋颺唯恐諸僕洩漏其
事欲行暗害由是張文成陳進孝等相率潛逃
至高然家報知文功恐係計誘不敢挺身告理
及臣蒞任始行赴控歷訊張天祥何二花子等
俱各供証情真進昇今經自認不諱張進昇應
按光棍爲首例擬斬進昇係旗下人應解部正

法張天祥何二花子張文成殘燬拋撒高然身
屍均應照爲從律擬徒李輔臣逼索高然餽送
禮物合擬重杖查張天祥張文成何二花子李
輔臣事犯俱在康熙二十三年九月二十四日
赦前相應免罪張弘韜將張進昇所付藥丸使呂竒
傳送張文成等囑其熬刑與代贍假券之朱國
熙不行勸阻之陳進孝俱有應得之罪查呂竒
朱國熙陳進孝係聽主指使各應照律免罪張

弘韜係監生考授州同職銜相應斥革合聽部
議東安縣革職知縣吳兆龍先借張進昇銀七
百兩後據陳進孝等供出張進昇殺害高然燬
屍拋棄情由自當卽行推究因張進昇將兆龍
所立七百兩借票送還遂置不問應遵康熙二
十五年五月初一日

上諭將吳兆龍免擬重辟發往尚陽堡但吳兆龍業
於另案問發尚陽堡仍於彼案歸結贓銀七百

兩照追入官至張進昇當日所領吳逆本銀據
稱原與丁弘陽李華同領銀十八萬兩進昇止
領三萬已經出首丁弘陽克發遼東伊子丁應
龍現在薊州貿易李華在洪恩寺出家等語丁
應龍李華俱未到案應聽部臣查案究奪逃犯
張奉等嚴緝獲日另結既據該道招詳前來理
合具
題伏乞

勅部核覆施行康熙二十五年九月十八日題二十
八日奉

旨三法司核擬具奏該刑部會同院寺會議得據直
隸巡撫于成龍疏稱張進昇知高然頗有積蓄
呼至家中索銀高然不爲曲從且以進昇隱匿
逆本銀竟行指出進昇恨怒將高然打死遂令
張天祥等碎戮其屍拋棄歷審俱自認情真將
張進昇以光棍爲首例擬斬將張天祥等擬徒

杖分別援

赦具題前來張進昇因高然指出逆本銀兩卽令張天祥何大花子等持棍毆打又自行打死戮屍滅跡揆此明係謀殺查律內凡謀殺人造意者斬從而加功者絞等語今此案該撫止將張進昇一人擬斬張天祥等擬徒杖援

赦具題情罪不符相應仍請

勅下該撫將張進昇等覆加詳審定擬併將逆本銀

兩與李華等對質審明具題到日再議可也等因康熙二十五年十月二十二日題二十四日奉

旨依議

巡撫直隸等處地方管轄紫荊等關宣府一鎮
地方密雲等關隘贊理軍務兼理糧餉都察
院右僉都御史臣于成龍 謹

題爲叩伸慘殺沉寃事該_臣看得張進昇打死高

然燬屍拋撒一案部覆張進昇因高然指出逆
本銀兩打死戮屍滅跡明係謀殺止將張進昇
擬斬張天祥等擬以徒杖情罪不符行_臣詳審
定擬并將逆本銀兩質明具

題行據巡道僉事胡獻徵覆審詳解臣復親鞫緣
張進昇稔知高然家有積蓄借端訛詐因其不
從剝衣毆打逼寫借券口稱沒有銀子就是人
口房地也罷等語是進昇此時意在詐財原無
謀殺高然之心乃高然不惟不遂其慾而且極
口辱詈進昇忿恨復行狠擊以致高然傷重殞
命並無同謀之處其燬屍滅跡係高然死後脫
禍之策亦非高然未死之先預爲之計今嚴訊

張進昇張天祥等謀殺情由堅不承認則張進
昇仍應照光棍詐財不遂打死人命之例立斬
不在張天祥等既非同謀相應仍照原擬原任
東安縣知縣吳兆龍名下贓銀亦照原議照追
入官至於張進昇等原領逆本行提李華丁應
龍等對質咸供止有三萬兩並無十八萬之數久
經刑部奉

旨審結張進昇因身犯大辟欲借逆本之未清以圖

緩結從前妄行供認今准刑部抄發原案查與
李華等供情相符無容再議既據該道呈詳前
來理合具

題伏乞

勅部核覆施行康熙二十六年二月二十日題二十

九日奉

旨三法司知道該刑部會同院寺會看得直隸巡撫
于成龍因太監張進昇等打死高然燬屍拋撒

將張進昇照光棍爲首例擬斬立決將張天祥
等擬以徒杖援

赦具題臣部等衙門議覆因高然係張進昇等謀殺
該撫止將張進昇擬斬將張天祥等擬以徒杖
分別援

赦具題情罪不符請

勅該撫覆加詳審定擬併將逆本銀兩與李華等對
質審明具題到日再議咨行去後今據直撫于

成龍疏稱張進昇稔知高然家有積蓄借端訛
詐剝衣毆打逼寫借券原無謀殺高然之心乃
高然極口辱罵進昇忿恨狠擊以致高然殞命
並無同謀之處其燬屍滅跡係高然死後脫禍
之策張進昇仍應照光棍之例立斬張天祥等
仍照原擬知縣吳兆龍贓銀亦照原議照追入
官至於張進昇等原領逆本行提李華等對質
止供有三萬兩並無十八萬兩之數與部抄發

原案相合無容再議等因前來查張天祥並脫
逃之張弘勳張錦何大花子等同張進昇剝高
然衣服網綁各持棍毆打勒寫五百兩銀借約
高然一更身死張天祥等又同碎戮其屍燒燬
拋揚河內揆此張天祥張弘勳張錦何大花子
等同張進昇喚至高然一齊殘忍剝衣網綁各
持木棍輪打勒寫借約以致身死碎割其屍用
火燒燬拋揚將張天祥只擬死後殘毀死屍律

擬徒援

赦具題不合查定例內凡惡棍勒寫借約嚇詐財物不遂其意竟行打死此等真正光棍事發者不分得財與未得財爲首者立斬爲從者俱擬絞監候秋後處決等語張進昇應照光棍爲首例擬斬立決張天祥應改依光棍爲從例擬絞監候秋後處決何二花子張文成不曾同行毆打但燒燬高然死屍拋撒合依凡殘毀人死屍爲

從律應各杖一百徒三年但何二花子張文成事犯俱在康熙二十三年九月二十四日

赦前均應免罪張進昇伊侄張弘韜家人呂奇聽從張進昇指使傳送熬刑藥丸與陳進孝張文成查律內一家人共犯止坐尊長等語呂奇應無容議張弘韜係監生考授州同職銜應咨該部斥革知縣吳兆龍先借張進昇銀七百兩因進昇發還借約將人命不究爲此情由應擬罪但

吳兆龍已經別案擬絞奉

上諭免死減等存留養親應無容議其名下贓銀仍照追入官周天祿等審係無干均應省釋脫逃張奉何大花子張弘勳張錦趙世德三娃子嚴緝獲日另結張進昇等原領逆本銀兩今與李華等對質咸供止有三萬兩與原案相符亦無容議至張天祥等係光棍爲從犯錯擬徒罪之處應請

勅該撫查取承問各官職名具題到日並該撫一併交與吏部議可也等因康熙二十六年三月初八日題十二日奉

旨張進昇着卽處斬張天祥依擬應絞着監候秋後處決餘依議

巡撫直隸等處地方管轄紫荆等關宣府一鎮
地方密雲等關隘贊理軍務兼理糧餉都察
院右僉都御史臣于成龍 謹

題爲稟報事該

臣

看得旗人鍾二卽鍾國璉等虎

踞河間府屬獻縣地方霸佔民人李進孝之妻
將進孝毆打身死移屍井內計圖滅跡獻縣知
縣白元亨據地方陳所明等呈報掘井起屍遍
體鱗傷當據進孝之父李義認明係伊子身屍

投告到縣復據民人蔡從知亦以鍾二霸佔伊
媳情詞具控該縣差拘審訊而鍾二等帶領進
孝之妻王氏並蔡從知之媳王氏潛匿旗庄褚
名山姚三府等家仗恃旗勢難以拘拏茲據該
縣查明旗色佐領申報前來臣竊照旗丁姦霸
民妻而殺其親夫屍經起獲事已敗露傳其質
訊潛匿不出以爲莫敢誰何將來殺傷橫道地
方官職難禁捕

畿輔係首善之地此風漸不可長臣故敢冒昧

陳伏乞

勅部將鍾二等押發到臣究審定案另疏具

題庶兇徒少知斂跡而冤鬼不致夜號矣理合具

題伏乞

睿鑒施行康熙二十五年七月二十二日題 月

日奉

旨據奏鍾二姦霸民妻殺其親夫潛匿旗庄大干法

紀鍾二等着嚴拿交與該撫究擬具奏該部知道

巡撫直撫等處地方管轄紫荆等關宣府一鎮
地方密雲等關隘贊理軍務兼理糧餉都察
院右僉都御史臣于成龍 謹

題爲稟報事該臣看得旗人鍾二卽鍾國璉與李
進孝之妻王氏通姦強霸爲妾將進孝打死拋
屍井內獻縣知縣白元亨據地方陳所明等呈
報起屍檢驗遍體鱗傷進孝之父認明係伊子
身屍赴縣控告民人蔡從知亦以鍾二姦霸伊

媳王氏控縣鍾二等事發潛逃經臣具疏

題叅奉

旨嚴拿究擬隨檄巡道僉事胡獻徵拏獲鍾二等研訊復解臣親鞫鍾二將謀殺李進孝及姦佔二婦情由供認不諱鍾二應按謀殺人造意者律擬斬查係旗人應解部監候李進孝妻王氏按姦婦不知情律擬絞監候蔡君秀妻王氏照例枷責俟產限滿日發落翟四見屍不報劉進禮私和人命與不行舉首之王一冬及受房地銀穀之王之業分別杖懲仍追贓入官逃犯吳四等嚴緝另結理合具

題伏乞

勅部核覆施行康熙二十五年十月十三日題二十三日奉

旨三法司核擬具奏該刑部會同院寺會看得鍾二謀殺李進孝姦霸王氏等一案據直隸巡撫于

成龍審擬斬絞杖罪具題前來查民人李進孝
曾借鍾二米豆議以傭工抵償並未立券後鍾
二窺進孝妻王氏姿色遂行姦霸爲妾恐進孝
告理囑令家人吳四等將進孝打死拋棄翟四
井內後地方陳所明等呈報起屍檢驗顛門肋
脇腎囊等十處有傷痕進孝之父李義認明係
伊子身屍赴縣控告民人蔡從知亦以鍾二姦
霸伊媳王氏爲妾控縣鍾二事發之後潛逃隨

卽弋獲歷審俱自認情真查律內凡倩工作之
人立有文券議有年限者以僱工人論止是短
僱月日受值不多依凡論等語李進孝雖在鍾
二家傭工並未立有文券議有年限應等凡論
鍾二合依謀殺人造意者斬監候律應擬斬監
候秋後處決係旗下人應解部監候王氏合依
姦夫自殺其夫姦婦雖不知情絞監候律應擬
絞監候秋後處決蔡君秀妻王氏合依通姦例

應枷號一個月折責四十板既稱有孕俟產限
滿日枷責給與原夫翟四將伊井內屍骸不曾
舉報合依地界內有死人不申報官司檢驗而
埋藏者杖八十律應杖八十折責三十板劉進
禮私和人命脫逃合依凡私和人命者杖六十
犯罪逃走於本罪上加二等律應杖八十折責
三十板王一冬知鍾二姦估伊女不行首告王
之業知鍾二姦霸伊女受鍾二所給房地銀穀

俱照不應重律杖八十折責三十板王之業所
得之財仍照追入官脫逃吳四等獲日另結褚
名山等審係無干均應省釋等因康熙二十五
年十一月十三日題十五日奉

旨鍾二依擬應斬王氏依擬應絞俱着監候秋後處
決餘依議

巡撫直隸等處地方管轄紫荊等關宣府一鎮
地方密雲等關隘贊理軍務兼理糧餉都察
院右僉都御史臣于成龍 謹

題爲官役加耗私派廉訪已有實據謹特疏糾叅
以伸

國法以甦民困事切照縣令一官與民最親必須
廉潔自持愛養羣黎俾各得所始無負牧民之
責任臣蒙

皇上殊恩昇撫畿甸時時以察吏安民爲念誠恐有
司各官有借端私派橫徵火耗等事自蒞任以
來屢經禁飭諄諄告誡不啻至再至三乃猶有
愍不畏法如保定府新城縣知縣巨文者徵收
錢糧則橫加火耗派用車驢竟婪索銀錢再縱
蠹虐民怨聲載道今據道府揭報合之臣訪聞
無異此一官者加耗婪私不顧法紀任意私派
罔恤民艱至緝盜一任蠹役之誣良凡公務每

以傲慢而貽悞難以一日姑容民上所當特疏
糾叅請

旨革職與有名蠹役一併提問究擬者也臣未敢擅
便謹

題請

旨康熙二十五年七月二十九日題八月初十日奉
旨這所叅巨文着革了職其私派虐民各款併本內
有名蠹役該撫嚴提究擬具奏該部知道

特加太子少保巡撫直隸等處地方管轄紫荆等關
宣府一鎮地方密雲等關隘贊理軍務兼理糧
餉都察院右僉都御史臣于成龍 謹
題爲兵餉之缺額日甚牙稅之欺隱宜嚴請
旨勅部清查以足

國用事該臣看得通州康熙二十一二兩年牙稅
銀兩支應過往官役油燭柴炭一案部議不准
開銷行令追解因將二十三年稅銀亦作未完

造入

奏冊屢行催解未據完報經臣將前任革職知州
傅澤洪署事州同陳俊民具疏

題叅部覆仍令速催完解行據守道叅議朱弘祚
詳稱該州地方水陸交衝實非他屬可比往來
官役絡繹不絕油燭柴炭因向有成例萬不可
缺自順治五年前任知州張萬春以動支無項
申部

題准將通灣牙稅銀七百二兩留抵支應迨康熙
十二年奉部駁查前任知州閻興邦復以供應
無出等事申詳前撫臣金世德咨部亦經名銷
歷年冊報無異今康熙二十一二三等年駁追
及未完之銀實係從前循例留抵支應之項查
經手各官前任署事州同高榮久經物故革職
知州傅澤洪係離任窮員胥役又皆更易逃去
一旦奉文追解無從着追接任官員豈能賠墊

特援

恩詔詳請

題豁并請將此項牙稅銀兩仍留供應等情臣查
通灣每年徵收牙稅銀七百二兩向來留支過
往官役油燭柴炭之用臣前任通州知州時亦
照例留支供應歷年報銷在案今既經部議將
康熙二十一二兩年不准開銷并二十三年支
過之銀亦作未完行令照數追解臣復何敢冒

瀆第此項稅銀原係循例留支非擅自動用者
可比况經管署事之高榮已經病故接任之傅
澤洪又經革職一貧徹骨實屬追賠無出仰祈
皇上俯鑒該州實係衝繁之區

勅部查明從前准留原案免其追賠至於嗣後應否
仍准留支供應統候部議定奪既據該道呈詳
前來理合具

題伏乞

勅部議覆施行

巡撫直隸等處地方管轄紫荊等關宣府一鎮
地方密雲等關隘贊理軍務兼理糧餉都察
院右僉都御史臣于成龍 謹

題爲拋梨訛詐持刀戮殺事該_臣看得奉差員役

經過州縣衛驛違例騷擾_臣蒞任後業經嚴示

禁飭今據通永道僉事宋犖詳稱據山海衛守

備楊彙吉申報正白旗撥什庫王進祖送梨至

山海關並無牌勘橫捉民夫又率領多人將馬

馱梨陸箕直入衛堂拋擲在地訛索銀兩不遂
持刀戮傷衛役薛得才現獲刺刀爲據似此旗
人橫肆殊干

功令相應據詳

題叅聽部提究理合具

題伏乞

勅部議覆施行

臣未敢擅便謹

題請

旨康熙二十五年八月十一日題二十二日奉

旨據奏撥什庫王進祖拋梨訛詐刀傷衛役殊干法

紀着嚴拿究擬具奏該部知道該本部議得據直

隸巡撫于成龍疏稱王進祖並無牌勘橫捉民

夫將梨馱直入衛堂拋擲在地訛索銀兩不遂

持刀逐殺戮傷衛役薛得才等語據王進祖供

我送梨來到了山海關並不曾帶領三十餘兵

私捉民夫及向守備訛索銀兩逐戮薛得才俱

不招認查守備楊彙吉係現任職官此案受傷
之人并于証如不質審不便擬罪應將王進祖
解發直撫其私捉民夫并訛索守備楊彙吉要
銀持刀逐殺戮傷衛役薛得才之處逐一質審
明白定擬具題到日再議可也等因康熙二十
五年十月十三日題本月十五日奉

旨依議

巡撫直隸等處地方管轄紫荆等關宣府一鎮
地方密雲等關隘贊理軍務兼理糧餉都察
院右僉都御史臣于成龍 謹

題爲拋梨訛詐持刀截殺事該

臣

看得撥什庫王

進祖拋梨訛詐戮傷衛役一案經

臣

具疏

題叅准咨發審行據巡道僉事胡獻徵審擬招解

臣復親訊緣進忠押送

上用梨駝行至山海衛地方橫捉民夫山海衛守備

楊彙吉因無牌勘不敢違例應付進祖輒肆咆哮卽將梨駝擡入衛堂用刀割開梨簍適有衛役薛得才在傍攔阻進祖刀戮其手拋梨而去該衛守備楊彙吉出關理論進祖復肆咆哮將衛官之帽打落於地歷審情真王進祖亦自認不諱應照律杖徒查係旗人解部發落餘審無干均應省釋理合具

題伏乞

勅部議覆施行臣未敢擅便謹

題請

旨康熙二十六年正月十三日題二月初三日奉

旨該部核擬具奏貼黃內祖訛忠着飭行該本部看得撥什庫王進祖戮傷衛役一案據直隸巡撫于成龍審擬徒罪具題前來查王進祖押送

上用梨馱至山海衛地方橫捉民夫山海衛守備楊彙吉因無牌勘不敢違例應付進祖卽將梨馱

擡入衛堂用刀割開梨簍有衛役薛得才攔阻
進祖刀戳其手拋梨而去該衛守備楊彙吉出
關理論進祖復肆咆哮將衛官之帽打落於地
該撫歷審自認情真除橫捉民夫毆官截役輕
罪不議外王進祖合依若主守之人將

御物棄毀者杖一百徒三年律係旗下人解部枷號
四十日鞭一百薛得才等審係無干均應省釋
可也等因康熙二十六年二月二十四日題本

月二十六日奉

旨依議

巡撫直隸等處地方管轄紫荆等關宣府一鎮
地方密雲等關隘贊理軍務兼理糧餉都察

院右僉都御史臣于成龍 謹

題爲州官濫徵剝民劣蹟昭著謹特疏糾叅以肅
功令事切念臣猥以菲材謬膺直撫重任時時以
整飭官方撫育黎庶爲念自蒞任以來屢經禁
飭所屬各官廉潔奉公愛養百姓申嚴告誡何
啻至再至三如新城縣知縣巨文穢聲載道經

臣特疏糾叅外今又訪有保定府安州知州胡
大定不畏

王章罔顧法紀錢糧加耗徵收市集濫抽私稅秫柴
灘派里民不給市價詞訟任意遲延奚知民累
本官雖經陞任部員但貪污不法難容寬假今
據道府揭報合之臣訪聞無異此一官者或加
耗以肥己或私稅以嚼民甚至短給市價怠於
聽訟民怨沸騰

國法難寬所當特疏糾叅請

旨革職與有名蠹役一併提問究擬以肅吏治者也

臣未敢擅便謹

題請

旨康熙二十五年八月初二日題本月十三日奉

旨這所叅胡大定着革了職其貪劣各款併本內有
名蠹役該撫嚴提究擬具奏該部知道

巡撫直隸等處地方管轄紫荊等關宣府一鎮
地方密雲等關隘贊理軍務兼理糧餉都察
院右僉都御史臣于成龍 謹

題爲特叅貪劣衛弁以儆官邪事竊照宣府地方
係荒瘠之區百姓困苦臣蒞任後嚴飭衛堡各
弁加意撫恤潔已奉公乃有不職衛弁如保安
衛守備傅之禮者貪婪敗檢穢跡彰聞今據直
隸守道叅議朱弘祚直隸巡道僉事胡獻徵口

北道叅議王隲宣府東路通判沈宏緒揭報劣
欵與_臣訪聞無異此一官者額外橫徵重加火
耗指協車而折價借牙行以漁利任蠹作奸賍
私狼籍甚且霸佔孀婦酗酒生事難容一日居
於民上所當特疏

題叅請

旨革職同有名蠹役一并提問究擬者也_臣未敢擅
便謹

題請

旨康熙二十五年八月初七日題本月
日奉
旨這所叅傳之禮着革了_其其貪劣各欵併本內有
名蠹役該撫嚴提究擬具奏該部知道

巡撫直隸等處地方管轄紫荊等關宣府一鎮
地方密雲等關隘贊理軍務兼理糧餉都察

院右僉都御史臣于成龍 謹

題爲特叅貪劣衛弁以儆官邪事該 臣 看得保安

衛革職守備傅之禮貪劣各款經 臣 具疏

題叅奉

旨嚴提究擬隨行提巡道僉事胡獻徵審擬招解 臣
復親訊傳之禮於康熙二十四年各項科派共

得贓銀四百八十六兩在康熙二十五年五月初一日

上諭以後發覺應予寬免其五月初一日以後所犯除取米粟牙行糧食春夏二季派折車價併誣王思俊爲竊縱僕擅取民婦以及誣申王汝高蘓天福等均係輕罪不議外其私抽鞭杖牙行稅銀三十六兩應照監守自盜律杖流係雜犯總徒四年任性慧合依衙役犯贓十兩以上例

并妻子安插於奉天地方居住張玉劉士義枷責革役林文達傅政竇科尤天選姜登傑卽加竒楊實楊維盛徐才并代起首稿之甘相俱各杖革查尤天選年已七十應照例收贖傅之禮等官役各名下糧石贓銀俱照追入官趙忠娶孫氏爲妻係之禮專主趙忠孫氏俱應免議仍照律離異財禮入官張連桂等審係抑勒出銀應毋庸議傅之禮私添牙行其私充者俱係失

業窮民應免罪仍盡行革去照額設牙辦課理
合具

題伏乞

勅部議覆施行康熙二十六年二月初三日題本月
十二日奉

旨該部核議具奏該刑部臣等看得保安衛革職守
備傳之禮貪劣一案據直隸巡撫于成龍來擬
流徒杖罪具題前來查傳之禮於康熙二十五

年五月初一日奉

上諭以後發覺加收火耗等項銀四百八十六兩並
五月初一日以後取米粟牙行糧食等項輕罪
不議外傳之禮私抽鞭杖牙行稅銀三十六兩
合依凡民間商稅已納而官隱瞞侵欺者計贓
以監守自盜論三十兩杖一百流三千里律係
雜犯總徒四年到配所折責四十板係貪官永
不叙用經承任性慧勒取紙筆銀十八兩九錢

零合依衙門蠹役恐嚇索詐十兩以上者併妻子安插於奉天地方居住例應解部安插於奉天地方居住捕役張玉劉士義私拷王思俊認爲竊盜合依番役人等獲盜私刑者於本衙門枷號一個月責四十板經承林文達得錢五千三百餘文傅政竇科各得錢一千文與催糧之差役尤天選姜登傑及私收牙稅之經承郭加奇加耗之經承楊實派折車價之經承楊維成

差役徐才併代王思俊起首稿之經承甘相俱合依不應重律各杖八十折責三十板內尤天選年已七十照律收贖張玉等俱革役趙忠娶孫氏爲妻係之禮主配趙忠孫氏俱免議仍離異其婪贓銀米財禮俱照數追取入官張連桂等審係抑勒給銀應無庸議傅之禮私添牙行盡行革去可也等因康熙二十六年二月二十日題本月二十二日奉

旨依議

巡撫直隸等處地方管轄紫荊等關宣府一鎮
地方密雲等關隘贊理軍務兼理糧餉都察
院右僉都御史臣于成龍 謹

題爲行取官員事該臣看得阜城縣知縣王焯歷
俸三年以上廉能愛民經臣於行取案內移咨
吏部准有覆咨王焯任內有李新家被盜停陞
緝賊一案該撫雖稱賊已全獲但未經兵部具
題開復無容咨取等因今據守道叅議朱弘祚

巡道僉事胡獻徵詳稱王焯承緝李新家盜案業准部咨開復本官此外並無未完錢糧盜案與行取之例相符開具履歷事實呈詳前來理合具

題伏乞

勅部議覆施行臣未敢擅便謹

題請

旨康熙二十五年八月二十四日題九月初四日奉

旨該部議奏該吏部臣等議得直隸巡撫于成龍疏

稱阜城縣知縣王焯經臣於行取案內移咨准

有覆咨王焯任內有盜案停陞一案雖稱賊已

全獲但未經開復無容咨取今業准開復此外

並無未完之案與行取之例相符等語查本年

五月內臣部題爲行取官員事疏稱阜城縣知

縣王焯有盜案停陞緝拿一案兵部未經具題

開復無容咨取等因具題在案查王焯係未經

開復不隄容取之員從無事結後再行具題補送之例相應將該撫具題王焯行取之處無容議等因康熙二十五年九月十四日題本月十七日奉
旨據該撫疏稱王焯廉能愛民緝盜之案已經開復著照所題准與行取不爲例

巡撫直隸等處地方管轄紫荊等關宣府一鎮地方密雲等關隘贊理軍務兼理糧餉都察院右僉都御史臣于成龍 謹

題爲奏銷康熙二十三年等事該_臣看得直隸各鎮協營兵丁月米經_臣核減具

題部覆直屬採買供應價值歷年俱係七錢二分至八錢一分行_臣照時價核減具

題行據守道叅議朱弘祚呈稱直屬報銷供應行

糧等項原係地方官多從四處採買或乘時預
備供應之日恒少價值雖奉核減尚可通融措
處在兵丁日給米一升僅折銀九釐五毫零星
自買較之時價實有不敷臣查兵米計口授食
所以資飽騰而責令防汛其折給價值既不敢
浮多以損課亦不敢虧短而苦兵今歲直屬歉
收米價日貴每月折給二錢八分五釐之數尚
不足買米三斗臣何敢再加刪減有負我

皇上軫恤窮兵至意仰祈

睿裁照

臣

前議每米三斗每月折給銀二錢八分五

釐以濟軍糈請俟大稔之年再議核減可也查
康熙二十五年分除支倉米外尚應撥米六萬
八千六百四十四石一升八合零共該銀六萬
五千二百一十一兩八錢一分零應於康熙二
十五年地丁銀內動給既據該道造冊請撥前
來除冊送部外理合具

題伏乞

勅部議覆施行臣未敢擅便謹

題請

旨康熙二十五年九月二十五日題十月初五日奉
旨該部知道該戶部臣等查得先經直隸巡撫于成
龍將直屬各營康熙二十四二十五兩年兵米
每石折給銀九錢五分等因具題臣部以直屬
採買米石並供應行糧等項價值歷年俱係七

錢二分至八錢一分報銷行令該撫據實照時
價核減具題到日再議去後今據該撫疏稱供
應行糧等項有係地方官多從四處採買者有
乘時預備者而兵米計口授食折給價值既不
敢浮多以損課亦不敢虧短而苦兵今歲直屬
歉收米價日貴每月折給銀二錢八分五釐尚
不足買米三斗何敢再行刪減祈照前議折給
俟大稔之年再議核減等因具題前來查前項

兵米該撫既稱直屬歉收米價日貴每月折給銀二錢八分五釐尚不足買米三斗難以再減俟大稔之年再議核減等語應如該撫所題折給俟成收之年仍照時值賤價具題折給可也等因康熙二十五年十月十六日題本月十八

日奉

旨依議

巡撫直隸等處地方管轄紫荆等關宣府一鎮地方密雲等關隘贊理軍務兼理糧餉都察院右僉都御史臣于成龍 謹

題爲滿糧採買維艱懇循成例截留漕米事該

臣

看得駐防官兵歲需米石因採買維艱每年

題請截留漕米支給在案今據守道叅議朱弘祚詳稱保屬地方原係圈殘之區今歲復遭蝗蝻收穫無多米價騰貴若使採買支放有糜公帑

其康熙二十六年需米九千二百六十八石二斗五升仍應照例截留東省漕米支給并請永爲定例等因_臣查此項駐防兵米向係截留豫漕及豫漕改折採買多累因請截留東省漕米俟價平仍行採買但截留漕米與夫撥銀召買均係動支

國課此贏則彼縮而一轉移間兵民各得其便况保屬原非產米之鄉市價恒貴每歲需米數千餘石採買不易除康熙二十六年分米石請照數截留東省漕米支給外仰祈

睿裁

勅部核議永爲定例既據該道呈詳前來理合具題伏乞

勅部議覆施行康熙二十五年十月初十日題本月十六日奉

旨該部議奏

巡撫直隸等處地方管轄紫荊等關宣府一鎮
地方密雲等關隘贊理軍務兼理糧餉都察
院右僉都御史臣于成龍 謹

題爲滿糧採買維艱懇循成例截留漕米事該 臣
看得保定駐防官兵康熙二十六年應需米石
九千二百六十八石二斗五升經 臣

題請截漕支給部覆以今歲保屬並未成災駐防
官兵向係地方採買支給等因隨檄守道轉行

欽遵去後據守道叅議朱弘祚呈稱保定府屬
今歲秋收歉薄米價騰貴仍請截漕支給等情
前來臣查康熙十八年戶部等衙門會議爲請
旨事內開如何使百姓不致困苦以足

國用有益兵餉之處務盡心速議陳

奏等因移咨前撫臣金世德曾確議

題請將豫省漕米截留支給保定滿糧部議覆准
奉

旨欽遵在案原非始於康熙二十二年

題請截留東漕也今歲保屬雖未成災而夏秋間

霪雨蝗蝻大概歉收米價騰貴現今每石市價

一兩五六錢不等若再加以採買九千餘石之

兵糈則米價益貴而小民資食艱難又恐貽悞

於軍需兵民俱受其累若責令地方官四遠採

買則脚費反倍於正價安保無不肖有司派累

於民臣轉輾思維無如循例截漕爲便況倉庾

與庫帑均爲

國課難分彼此天津鎮標各營現俱截漕支給何
獨靳於保府兵米乎一轉移間而官民與兵均
在


皇仁浩蕩之內矣臣從兵糈起見冒昧再請二十六
年保定駐防兵米仍請截留東省漕米支給俟
歲豐價平再行採買統聽部議理合具

題伏乞

勅部議覆施行康熙二十五年十二月初八日題本

月十八日奉

旨該部議奏



表

三

一

